

四庫全書

子部

欽定四庫全書

子部

香祖筆記卷一至

三

詳校官監察御史

臣劉人客

員外郎

臣

牛稔文覆勘

總校官檢討

臣何思鈞

校對官員外臣張慎和

謄錄監生

臣駱鍾球

欽定四庫全書

子部十

香祖筆記

雜家類三

雜說之屬

提要

臣等謹案香祖筆記十二卷

國朝王士禎撰皆康熙癸未甲申二年所記其  
曰香祖者王象晉羣芳譜曰江南以蘭為香  
祖士禎蓋取其祖之語以名滋蘭之室因以  
名書也是書體例與居易錄同亦多可采惟

其中姚旅露書以章八元詩為盧照隣某詩

話以柳惲詩為趙孟頫

案某詩話原本不著其名蓋有所諱今亦

仍其舊文記憶偶誤事所恒有指其疎舛足矣而

一則以為無目人語一則以為眯目人道黑

白肆口毒詈皆乖著書之體士禎池北偶談

任惇表語一條何嘗不以劉禹錫覆舟側畔

千帆過病樹前頭萬木春二句為白居易詩

漁洋文略遊攝山記何嘗不以左思振衣千

仍岡濯足萬里流二句為郭璞詩乎此由晚年解組侘傺未平筆墨之間遂失其冲夷之故度斯亦盛德之累矣又第十二卷一條曰輟耕錄言或題畫曰特健藥不喻其義余因思昔人如秦少游觀輞川圖而愈疾黃大癡曹雲溪沈石田文衡山輩皆工畫皆享大年人謂是烟雲供養則特健藥之名不亦宜乎案法書要錄載武平一徐氏法書記曰駙馬

武延秀聞二王之迹強學竇重乃呼薛稷鄭

愔及平一評其善惡諸人隨事答稱為上者

題云特健藥云是突厥語

案唐書稱延秀嘗質於突厥解其國

語書法要錄所載太平公主三歌藐提四字印亦突厥語也

其解甚明士

禎乃以字義穿鑿殊為失考此非僻事殆老

而忘乎然其品題文藝宏獎風流至於老而

不衰固足尚也乾隆四十六年十二月恭校

上

總纂官臣紀昀臣陸錫熊臣孫士毅

總校官臣陸費墀





欽定四庫全書

香樹筆記卷一

刑部尚書王士禎撰

康熙四十一年壬午三月初五日

文華殿經筵臣士禎以

經筵講官刑部尚書侍文淵閣大學士吏部尚書熊賜履禮部侍郎羅察進講四書樊遲問仁子曰愛人一節禮部尚書韓爌工部侍郎舒輅進講易經繫辭居則觀

其象而玩其辭四句講畢

賜宴太和門

江南道監察御史張瓊題為逆惡之罪既已正典於前  
朝私豎之碑豈宜傳流於後世亟請乾綱勅毀以儆奸  
邪以垂鑒戒事恭聞我

皇上前歲翠華南幸命修岳飛之墓賜題于謙之碑誠  
以此二臣者忠貫日月義壯山河故特表而揚之以風  
示天下夫善在必彰者則惡在所必瘠臣奉命巡視西

城前往西山一帶查閱至香山碧雲寺寺後峻宇繚牆  
覆壓數里鬱蔥綿亘金碧輝煌疑是前代王侯寢宮詢  
之土人乃知為故明罪惡滔天磔尸身後逆璫魏忠賢  
之墓墓上有穹碑二屹然並立合書欽差總督東廠官  
旗辦事掌惜薪司內府供用庫尚膳監印務司禮監秉  
筆總督南海子提督保和等殿完吾魏公忠賢之墓臣  
觀覽之下不禁髮指夫魏忠賢者在故明天啓時竊操  
國柄屠毒忠良惡貫滿盈一時羣小皆出其門德碑生

祠幾徧天下神人共憤道路以目至崇禎初年罪狀發露押往祖陵潛行自盡磔尸河間迄今公論在人尚恨戮尸不足以蔽厥辜乃畿輔近地尚留此穢惡之蹟僭越之制何以懲巨憝昭大法哉況當奉

旨纂修明史之時凡明季忠良被禍諸臣無不立傳表揚以彰公道光天化日之下豈容奸孽餘黨膽大潑天目無三尺仰祈

天威乾斷

勅地方有司立仆其碑刻平其墓俾天下後世知凶惡  
之徒不能違憲典於身前并不能保墳墓於身後其於  
聖明瘳惡之義不啻炳如日星嚴如斧鉞矣云云奉

旨魏忠賢碑墓著交與談城官員仆毀刻平談部知道  
瑗賦詩記事云彰瘳表天道誅賞昭王綱伊誰實職之  
蘭臺凜秋霜道惟鉏姦穴庶以全善良攬轡出都門陟  
睇西山岡廬舍匝阡陌各各營農桑厥俗一以樸民氣  
尤悅康榛莽化蘭蕙無復嗥豺狼尋憩古佛刹紺碧何

卷一  
輝煌背負諸墓碣封樹皆貂璫逆閹塚踰制陵園相頡  
頽穹碑矗霄漢長松繞垣墻以彼稔凶惡萬死奚足償  
搏噬縱鷹犬湯鑊烹鸞鳳天地盡冥晦白日無晶光古  
多寺人禍茲禍踰漢唐國步倏艱危社稷旋淪亡彼身  
已寸磔墓胡留山陽我見髮上指衝冠心激昂及此不  
鏹雖無乃忤蒼蒼拜疏請

明旨

聖德奮乾綱碑仆墓亦毀狐兔將安藏堯舜除四凶海

字稱平章誅惡及勝國來者心自臧岩壑湔穢濁草木  
田芬芳聊以佐史筆憲紀於焉張瑗字蘧若邠門人予  
辛未科所取會元也以編修改御史一時賦詩紀者甚  
衆禎按工部郎中萬公燦疏云臣於三月詣陵開工過  
香山碧雲寺見魏忠賢所營墳墓碑石崢嶸隧道深閤  
翁仲簪朝冠而環列羊虎接駝馬以森羅制作規模髣  
髴陵寢云云則閹擅國柄時自營生壙已久特既誅之  
後未有建議毀之者故倖存至今耳

羽紗羽緞出海外荷蘭暹羅諸國康熙初入貢止一二  
足今閩廣多有之蓋緝百鳥毳毛織成予按異物彙苑  
唐安樂公主使尚方合百鳥毛織為裙正視旁視各為  
一色日中影中各為一色而百鳥之形狀皆見然則古  
亦有之矣又南史齊文惠太子織孔雀毛為裘華貴無  
比武后有集翠裘以賜倖臣皆其類也又滿刺加哈烈  
出鎖襖一名梭服鳥毳為之紋如紉綺今閩中最多價  
不甚高非羽紗羽緞比



浙江巡撫某疏明紹興府知府湯紹恩於三江海口築塘建閘旱澇無害逮我

朝定鼎以來洩水驅沙靈異尤著禦災捍患利益宏多  
伏祈

勅賜褒封祀典云云下禮部議允行

京師粥花者以豐臺芍藥為最南中所產惟梅桂建蘭  
茉莉梔子之屬近日亦有佛桑榕樹榕在閩廣其大有  
蔭一畝者今乃小株僅供盆盎之玩佛桑重臺者永昌

名花上花見蕤林伐山

鄧處士萬斯同字季野與其兄斯大字充宗同游黃太  
冲之門充宗研精經學而季野貫穿史事于明代三百  
年典故如指諸掌史官總裁諸公聘入京師一切皆取  
衷焉初先伯祖太師公

諱象乾

列傳汪編修

琬

倪檢討

祭

各有撰述季野從實錄搜采十許事補入視二君為詳  
其所撰宋季忠義錄十二卷一卷載恭帝端宗末帝本  
紀陳仲微二王始末二卷迄末自江萬里文天祥而下

逮劉辰翁凡四百六人皆向來紀載所未備也所著又有南宋六陵遺事一卷庚申君遺事一卷補歷代史表六十卷歷代宰輔彙表八卷廟制圖考四卷河渠考十二卷崑崙河源考二卷儒林宗派八卷羣書疑辯十二卷書學彙編二十四卷可謂通儒壬午四月歿於京邸甚可惜也

自己卯順天鄉闈

乾清門覆試舉人後直省考試官自侍郎以下樂行開

列恭候

欽點壬午鄉試以副都御史張睿主考陝西御史吳甫  
生副之吏部文選郎中陳汝弼主考江南工科給事中  
黃鼎楫副之御史劉子章主考江西御史傅作楫主考  
浙江翰林滿洲阿爾賽副之湖廣巴海

大理評事  
門人

山東

滿保河南傅森皆翰林滿洲人山西孫致彌戊辰庶吉  
士副都御史御史庶吉士典鄉試自是科始

二十年來京師士大夫不復用金扇初則尚金陵仰氏

伊氏素紙扇繼又尚青陽扇武林各色夾紗扇未幾廢而不行獨尚曹氏靴扇溧陽歌扇一時風會雖小物亦然殆不可曉也

壬午七月浙江巡撫趙申喬疏言浙省每科試卷一萬二千有奇舊例同考官僅十三人不能徧閱請增三員禮部覆允併通行各直省如有試卷數多房考不足者題明量行增加得

俞旨是科浙闈解額視江南之數并著為例

丙子予奉

命祭西嶽西鎮登鳳翔靈山靈鷲寺見如來泥洹像諸  
弟子有悲泣者竊以為疑適觀世說顧敷七歲言當由  
忘情故不泣未能忘情故泣尋味二語大有解會

康熙庚辰夏六月二十八日蒙

恩賜

御書帶經堂扁額謹紀述于居易錄末卷今年壬午四  
月六日再蒙

恩賜

御書信古齋扁額回憶戊午夏初蒙

恩賜存誠格物二扁己二十五年矣二十五年中三蒙  
御筆題

賜堂額榮寵踰涯宋學士蘇易簡獲賜飛白玉堂之署  
四字一時輒侈為盛事臣之蒙

恩何啻什倍恭為摹刻懸於蓬蓽之居而什襲

御墨於寶積謹紀

金史卷一百一十五  
卷一  
頒賜年月以示世世子孫勿忘報稱云

壬午六月初九日

召集內閣九卿及翰林卿寺科道各部郎中四品以上  
官於

保和殿傳

上諭云尋章摘句華麗詞藻非帝王之本朕四十餘年  
惟日兢兢未嘗少釋萬幾自警有始無終之誚念茲在  
茲也政事之暇頗好書射歷年以來所積臨摹字幅



賜卿等觀之臣士禎得絹素大字一幅共二十七字云

惟正是視玄黃匪惑非禮不觀儀型是則慎爾所覲無

愆斯德臨朱芾首尾凡小璽三曰淵鑒齋長一寸餘闊八分白文康

熙宸翰

方一寸三分白文

勅幾清晏

方一寸四分朱文

是年七月二十

三日恭紀

浙江鄉試廣額既奉

特旨允行順天府府尹錢晉錫上疏以京畿國學首善之地請照浙江例增廣解額禮部覆准順天等府廣額

十人國學八人奉天府一人宣化府一人八旗滿洲蒙古三人漢軍一人共廣額二十人湖廣總督郭琇亦以湖南北地大人衆援例疏請部覆准照浙江例廣十三人可謂一時右文盛事然止順天國學浙湖三直省而他省督撫未及疏請部議遂未之及未免向隅矣至予鄉為

孔子闕里所在解額六十名而至聖裔四氏學二人即在解額之內則視他省尤為未均惜無言之者

梵言薜荔猶此言餓鬼出大藏服字玉

盤山拙菴

智朴

和尚自江南還山以滄浪高唱畫冊來索

題蓋師訪宋牧仲開府於吳門適朱竹垞

葵尊

太史自禾

中來會於滄浪亭共賦詩見懷而畫史高簡圖之者也

宋詩云青溝闢就老煙霞瓢笠相過道路賒携得一餅

豆苗菜

菜名

出山

來看三月牡丹花因緣大事公能了潦

倒羸官我自嗟好向滄浪亭子上桺檀香裏奉袈裟經

行斜日且觀魚黃鳥緣蠻入耳初接席金風舊亭長

竹垞

懷人蠶尾老尚書

本阮

春溪玉版容叅悟歲晚花宮待掃

除拂子一揮仍小住空林明月暮鐘餘

提督山西學政翰林院侍讀汪灝以大同府人文勝前  
疏請撤去門字號照福浙總督侍郎郭世隆三十六年  
題請臺灣一府撤去至字號與通省一體勾中之例部  
覆得

旨允行

河南巡撫侍郎徐潮疏言二程子後裔五經博士程佳

璠病廢請以其子程舉承襲

明宏治中京口人錢寶者善醫嘗遊齊魯間遇一老僧能卧大雪中雪為不積問其年數百歲矣後至金陵居天界寺撫摩能療諸疾後尹蓬頭客於錢氏錢偶言僧狀尹曰吾師祖也別來久尚亡恙耶已而尹去老僧復至京口錢為述尹語僧曰是吾孫也徐出度牒示錢則唐大中四年所給已八百年矣僧秦人不知名字

見外史

唐時升叔達三易集有南翔八老人詩序云南翔里有

八老人為社徐爵九十六趙陸九十四陸淙八十五徐  
勲張樂俱八十四董儒八十三朱梓八十二陸球八十  
一居止不一二里而耄耋相望日杯酒談笑相娛樂誠  
太平盛事也詩云白鶴村頭春日曉香霧濛濛百花好  
蒼顏素髮八老人花前置酒相傾倒笑說鄰翁學語時  
追談邑子知名早不知主客更勸酬爭引曾玄互提挹  
今年孟春甲子晴占云麻麥俱豐成坐中祭酒九十六  
敬酌社翁旨且清其間迭起拜更祝但願脚健雙眸明

桂林從事八十一只聞喚弟無呼兄南村翳翳桑榆日  
出且持杯歸散帙但課兒孫種黍苗何知道士餐芝朮  
香山居士有遺篇九十不衰真地仙公等康健逢聖世  
能無旦莫歌皇天願炊香飯釀秫酒日奉杖履長周旋  
正嘉遺事多訛謬欲聞鑒輿南幸年魏學禮長林片葉  
集有九峰青厓先生年一百二十一歲詩尤奇

樂府碧玉破瓜時而談苑載呂洞賓謁張洎贈詩云功  
成應在破瓜年洎後以六十四卒破瓜者二八也老少

男女皆可稱破瓜亦奇

山海經云北號之山有木狀如楊赤華其實如棗而無  
核其味酸甘食之不瘧此即吾鄉之虛中棗也出青城  
縣漢上林苑有楊棗見西京雜記又東坡有與蒲傳正  
覓柿霜無核棗帖元遺山有跋見玉堂嘉話

異物彙苑巴旦杏出哈烈國今北方皆有之京師者實  
大而甘山東者實小肉薄少津液土人賤之不食獨其  
仁甘可以佐菹



漢上林令所記桃十種有櫻桃舍桃舍桃卽櫻桃且非  
桃類

金剛鑽形如鼠糞色青黑如鐵石產西域諸國在鷲鳥  
海東青所遺糞中以之鑄鏤無堅不破右齊東野語所  
記或云扶南國剛金能切玉扣以殺角則判張洪使緬  
錄云緬蠻地有木曰金剛纂狀如棕櫚枝幹屈曲無葉  
剉以漬水暴牛馬令渴極而飲之食其肉必死此又草  
木之毒者而名同

京官舊例各衙門稱謂有一定儀注不可那移如翰詹  
稱老先生吏部稱選君印君員外以下稱長官科稱掌  
科道稱道長是也自康熙丙子祭告回京見聞頗異各  
部司及中行評博無不稱老先生者矣此亦觚不觚之  
一也

考工記韠人

音運

為臯陶鄭司農注臯陶古木也

徐渭路史一條云唐時高麗貢松煙墨和麋鹿膠造墨  
名隄糜此說杜選陋甚按隄糜漢縣名地出石墨即今

隴州之汧陽見於漢官儀其來舊矣非始於唐且與高麗無涉

青藤山人路史云中山酒中山兔毫竝是應天府之溧水縣非古中山也不知何据亦出杜撰

高季迪明三百年詩人之冠冕然其明妃曲云君王莫殺毛延壽留畫商岩夢裏賢此三家村學究語所謂下劣詩魔不知季迪何以墮落如此而盲者反以為警策其後有彭三吾者又云畫師休畫殺夢弼要人圖轉入

魔道矣又胡虛白詠綠珠云枉費明珠三百斛荆釵那  
及嫁梁鴻郎瑛稱之皆所云癡人前不得說夢也若永  
叔耳目所及尚如此萬里安能制夷狄所謂詩論亦自  
近腐

以詹事府詹事兼侍讀學士徐秉義

前吏部  
右侍郎

原任翰林

院侍講徐元夢

滿洲人

為順天考試官二君皆癸丑科進

士

郎瑛七修類纂舉東坡跋林和靖詩詩如東野不言寒

書似西臺差少骨以西臺為南唐李建中謬甚南唐太弟太傅李建勲非建中也建中宋初人為西京御史故稱西臺其書與楊風子先後齊名蘇黃常稱之郎未知耶

剛卯或曰嚴卯見王莽傳或曰殺改

以音聞

見說文玉篇

以正月卯日作而佩之服虔云長三寸廣一寸四分晉灼曰長一寸廣五分或用玉或用金予於慈仁寺市中曾見一枚乃以象牙為之八分書六十六字又按後漢

與服志長寸二分方六分諸侯王列侯以白玉中二千石以下黑犀三百石已下以象牙

類纂載武林女子金麗卿詩家住錢塘山水圖梅邊柳外識林蘇郎瑛謂其不能守禮出則擁蔽其面時方食不覺噴飯滿案又謂謝無逸以胡蝶詩得名號謝胡蝶後李商隱襲其語云云則是以唐人蹈襲宋人矣更可一笑

己卯十一月熊青嶽太宰拜相時宛平胥庭王公為首

揆沁州吳公銅川次之而孝感乃故相再入內閣或疑其位次王公云若熊公徑以大學士召還自當為首揆今以禮書召遷吏書而始大拜是由尚書大拜非以大學士召還也不當讓熊遂次吳而桐城張公敦復又次熊及王公引疾則丹徒張公素存為首揆桐城請告歸矣

熊乃王敦  
習門生也

御史劉子章條奏外官禁止多帶家口下吏部議督撫止許五十人藩臬四十人道府三十人州縣十五人違

例者革職下九卿詹事科道集議予謂自督撫已下皆遞減十人胡為州縣之於道府頓減其半也衆難之乃定為二十人而女口不與此數違例者止於降級再奉旨以旗員差多許倍之

辛巳冬杪得倪雲林喬柯竹石小幅澹逸絕塵題字尤古勁真蹟也詩云隱士江陰許士雍鈿山湖裏泊煙蓬秋來鱸膾蓴羹美亦欲東乘萬里風後署甲辰八月倪

瓚

雲林政居在厚  
山地名厚陽



庚辰三月朝陽門外東嶽廟火殿廡皆燼獨左右道院  
無恙

特發內帑并令在京在外大小官員捐助仍以裕親王  
監視之閱歲始畢工

親臨幸馬廟中仁聖帝炳靈公司命君四丞相像皆元  
昭文館大學士正奉大夫秘書監卿劉元所塑元最善  
搏換之法天下無與比至是皆燬於火

羅泌路史云巢父友許繇樊豎繇居沛澤其道日光堯

朝焉而適之父適聞之洗耳於潁豎方飲其牛乃毆而還  
子革注豎字仲父然則洗耳者巢父飲牛者則樊豎又  
別自一人妄說紛紛諸子識緯之書杜撰大抵如此可  
發一笑

蟲牢地名見春秋其地在今河南之封丘縣然路史雜  
國名又有蟲氏牢氏蟲氏條下曰邾地後有蟲氏牢下  
曰古牢子國後有牢氏

武會試舊無廷對臚傳之例有之自明末崇禎辛未科

始從考試官方逢年之請也

王孟端仿雲林古木叢篁自跋云幽篁古樹玉森森白石  
仙人翠作襟夜月幾驚龍虎立秋風時聽鳳凰吟畫圖入  
思曾飛筆山水留情獨撫琴不是遠尋高士宅何能慙我  
出塵心又季廸和東山逸叟和青箬谿道人四言一首

壬午順天鄉試五經監生二人一莊令與江南武進人  
一俞長策浙江桐鄉人初以違例貼出仍具題請

旨奉

金定曰履合言  
卷一  
旨俱著授為舉人准會試嗣後願做五經者不必禁止  
作何定例九卿等詳議具奏

九月初六日辰刻

文華殿經筵講官禮部尚書韓爌吏部左侍郎傅繼祖  
進講四書子路問政子曰先之勞之一節臣刑部尚書  
王士禎兵部右侍郎兼翰林院掌院學士法良進講易  
經觀乎人文以化成天下一句講畢

賜宴太和門

翰林掌院舊皆以學士兼禮部侍郎滿官漢官皆然自  
崑山徐相國以大學士兼掌桐城張相國以禮部尚書  
兼掌與往例不同然凡啓

奏講書等事仍滿前漢後不論所居之本官也今長洲  
韓宗伯兼掌院事亦然

唐國史補謂漠漠水田飛白鷺陰陰夏木嘯黃鸝乃右  
丞竊取李嘉祐語論者或為王諱以為增漠漠四字便  
是點鐵成金手段此亦嚙語然此事往往有之予門人

太倉崔舉人華字不雕貧而工詩嘗有句云溪水碧于  
前渡日桃花紅似去年時予在廣陵作論詩絕句四十  
首舉此二句云江南腸斷何人會只有崔郎七字詩後  
汪鈍翁在京師亦有句云溪水碧於前渡日桃花紅似  
去年人謂非取崔前語乎汪於崔亦前輩也

譚輅云劉季緒好詆訶文章掎摭利病徐陵為一代文  
宗未嘗詆訶作者昔予與故友汪鈍翁在京師鈍翁好  
詆訶人前輩名宿自某某而下無得免者後進以詩文

請質亦無恕詞予每勸之故友計甫草東嘗序予門人

汪蛟門

懋

集云鈍翁性惰急不能容物意所不可雖百

賁育不能揜其口也其所稱述於當世人物之衆不能  
數人焉阮亭性和易寬簡好獎引氣類然以詩文投謁  
者必與盡言其得失不少寬假此數語頗得予二人梗  
槩顧施愚山又嘗謂予公好獎引人物自是盛德然後  
進之士學未有成得公一言便自詡名士不復虛懷請  
益非公誤之耶予思其言亦極有理

門人李少京兆子來視言曩過漢中聞南鄭縣之東有民家老嫗年百二十歲矣尚強健無恙李自往訪之云晨出往田間栽種未及見

廣州府佛山有諸生黃章者年一百二歲康熙己卯尚入省闈自言吾今科且未中來科百五歲亦未中至百八歲始當獲雋尚有許多事業出為國家効力耳聞近歲已死其言無驗

九月二十五日



車駕南巡視河工

十月初九日夜再雪竟夜積素滿庭晚菊尚敷腴可玩  
晨起忍寒坐信古堂對雪看菊忽梁溪琴僧岳蓮見過  
彈平沙落鴈漢宮秋二曲古音蕭索忘其身長安官  
是秋曹之長也作二詩紀事

臺灣古荒服在福建東南大海中西界於漳南鄰於粵  
北與閩安相直其水道則東連日本南鄰琉球暹羅呂  
宋荷蘭諸國其沿革莫得而詳也明嘉靖四十二年流

寇林道乾作亂都督俞大猷勦之追及澎湖道乾遁入臺灣大猷不敢偏留偏師駐澎湖島時哨鹿耳門外徐俟其散道乾遁往占城道乾既去澎湖駐師亦罷天啓

改元有願思齊者為日本國甲螺

猶頭目也

引倭酋歸一王

屯臺灣閩人鄭芝龍附之始建平安鎮城既而荷蘭國人舟遭颶風至此愛其地借居之遂與倭約盡有臺灣之地而歲輸鹿皮三萬荷蘭國人善火器其居臺灣也以夾板船為犄角雖兵不滿千南北土酋咸畏之又建

赤嵌城以居順治庚寅日本甲螺郭懷一謀逐荷蘭人

事覺懷一被殺於歐汪

在今鳳山縣界

辛丑鄭成功自江南敗

歸勢日蹙頓軍廈門適日本甲螺何斌與荷蘭酋長隙

潛誘成功進取臺灣鹿耳門詰屈回旋沙浮水淺猝難

飛渡成功舟至水忽漲十餘丈巨艦縱橫畢濟遂克臺

灣荷蘭國人與成功戰不利退保安平鎮城其酋歸一

王以死拒之成功力攻不克乃還山列營以困之荷蘭

人勢窮以十餘艘決戰成功用火攻盡焚之荷蘭人遁

歸其國成功既有臺灣以赤嵌城為承天府改臺灣土城為安平鎮總名曰東都未幾成功死其子經居鷺江

即今廈門

成功弟世襲陰有竊據意經攻逐之世襲渡海來

歸經僭立改東都曰東寧改縣曰州設安撫司三南北路澎湖各一辛酉經死子克塽嗣康熙二十一年壬戌福建總督姚啓聖用間謀陰結傅為霖為內應事洩為霖遇害明年癸亥靖海將軍施琅奉

命率舟師進討六月自銅山抵澎湖入罩灣連克虎井

桶盤諸嶼誓師戒嚴鄭克塽奉表降

詔赴京師隸旗下于其地設臺灣府統臺灣鳳山諸羅  
三縣隸福建布政使司云

十月二十七日

車駕回

宮

御賜內直吏部尚書陳廷敬副都御史勵杜訥右諭德  
查昇各松花江石小研一方色澹綠如洮石腹有

御書研銘八字云以靜為用是以永年繼又

賜大學士張玉書吳璵熊賜履工部尚書王鴻緒各一方鴻緒所得有倭漆研匣匣中有

御用墨四笏時十一月偶

召張及王入

南書房編次

御書得

賜因及吳熊二公云

駕在德州

賜致仕在籍戶部左侍郎田雯寒綠堂扁額原任翰林  
侍讀蕭惟豫編修田需亦蒙賜

御書各一幅

召戶部郎中陳奕禧入

南書房

命書大小字各三幅

賜御書

御製塞上詩一幅詩云半嶺黃雲合風悲鼓角聞野獮  
沙草外落日自成羣

御製宋高宗父母之仇終身不報論

命大學士熊賜履禮部尚書韓爌

內直吏部尚書陳廷敬右諭德查昇同作又

命浙江舉人查慎行

原名  
嗣堯

等同作進

呈

詔蠲甘肅等處地方四十一年四十二年錢糧江南上



江下江四十二年錢糧

十二月諸王內閣九卿翰詹卿寺科道請上

尊號奉

旨朕即位四十餘年未嘗少刻不以民生休戚為念遠  
邇安靜為本雖或慶雲景星嘉禾瑞草天書麟鳳之奇  
總無關於黔黎亦無關於朕心反為史書之譏朕以實  
心為民天視天聽故有其道難免後人公論若耀功德  
取一時之虛名朕之不悅甚矣毋煩數陳

上召海寧舉人查慎行武進舉人錢名世長洲監生何焯休寧監生汪灝於

南書房屢試詩及制舉文

特賜焯灝舉人明年一體會試

考試新差提督各省學政翰林侍讀學士張廷樞等郎中翁嵩年等十一人於

南書房稱

旨人賜

御書一幅

八股題夫子循循然善誘人一節詩題恭和御製考試嘆

壬午冬

駕歸自德州考試

內直諸詞林官至二十二日封印後一日始畢定一等十人侍讀學士陳元龍等二等若干人其三等五人調知縣用諭德王化鶴中允吳晟修撰戴有祺字元祐檢討趙爾孫吳文炎

命吏部右侍郎吳涵兼掌翰林院事

山行慮迷握嚮蟲一枚於手中則不迷見物類相感志  
近時有人作嚮言取此

明文士如桑悅祝允明皆肆口橫議略無忌憚悅對丘  
文莊言舉天下文章惟悅其次祝允明世但嗤其妄人  
耳允明作罪知錄歷詆韓歐蘇曾六家之文潁文周內  
不遺餘力謂韓傷易而近儼形羸而情霸其氣輕其口  
誇其發踈躁歐陽如人畢生持喪終身不被袞繡東坡  
更作儼浮的為利口譁獷之氣肆溢舌表使人奔迸狂

顛而不息曾王既脫衣裳并除爪髮譬之獸齧腊骨至  
於老泉潁濱秦黃晁張則謂不足盡及惟柳如冕裳珮  
玉猶先王之法服乃其大旨則在主六代之比偶故實  
吁亦鄙而倍矣論唐詩人則尊太白為冠而力斥子美謂  
其以村野為蒼古椎魯為典雅麤獷為豪雄而總評之  
曰外道李則鳳凰臺一篇亦推絕唱狂詩至於如此醉人  
罵坐令人掩耳不欲聞論詩餘則專祖太白飛卿稍許歐晏  
周柳以為綴旒謂東坡木強疏脫少游魯直特市廛小

家之子略舉大端如右所謂無忌憚者不足置辯也  
西園雜記記明大臣壽考者自王端毅公魏文靖公而  
下十三人而不及雒陽劉文靖公晦菴文靖壽九十餘  
近百歲又弘正名相也何獨遺之

釋氏言羚羊挂角無跡可求古言云羚羊無些子氣味  
虎豹再尋他不著九淵潛龍千仞翔鳳乎此是前言注  
脚不獨喻詩亦可為士君子居身涉世之法

大竹破山和尚天童密弟子也蜀亂後居萬峰賊李鷄

予者殘忍嗜殺延師供養請肉食師曰公不殺人我便  
食肉李笑而從之全活無算師蹇姓忠定公之裔孫也  
鄭端簡云十哲陳蔡一時與難之賢非孔門定論自開  
元至今無敢議者夫有若之言四見於論語大類聖人  
公西赤志於禮樂有為邦之才不遠優於宰我冉求乎  
求我言行不必徵諸史傳論語中多有之矣其視二子  
優劣何如宜進祀二子於殿上改求我於廡中右與予  
官祭酒時具疏大意略同惜為友人中阻疏不果上即

當時禮部未必果行要當存此一段公論於天下後世耳予至今悔之

皮日休本字逸少後字襲美見北夢瑣言

康熙乙丑夏予使粵東還便道遊廬山宿開先寺觀陽明先生石壁大書紀功碑末云嘉靖我邦國若前知世宗入繼大統者按碧里雜存陽明既平田州之亂先是州有巨石側卧江澚舊有童謠云田石傾田州兵田石平田州寧岑猛惡之夜遣人平之明復如故先生定亂



後其石即平先生自往觀之洗剔苔蘚有古刻新建伯  
三大字異之遂續加八字併刻於石云嘉靖歲戊子新  
建伯王守仁又記先生習靜陽明洞預知門人朱白浦  
蔡我齋入山事中庸云至誠之道可以前知陽明其庶  
幾乎

樂郊私語云海鹽少年多善歌蓋出於潯川楊氏其先  
人康惠公梓與貫雲石交善得其樂府之傳今雜劇中  
豫讓吞炭霍光鬼諫敬德不伏老皆康惠自製家僮千

指皆善南北歌調海鹽遂以善歌名浙西今世俗所謂  
海鹽腔者實發於貫酸齋源流遠矣

香祖筆記卷一

欽定四庫全書

香祖筆記卷二

刑部尚書王士禎撰

異物類苑云山都人面黑長身有尾踵見人則笑笑則上脣掩目按諸書言人都鳥都猪都皆不爾此乃誤以狒狒為山都耳

僅字有少餘二義唐人多作餘義用如元微之云封章諫草繁委箱笥僅逾百軸白樂天哭唐衢詩著文僅十

首六義無差忒小說崔煒傳大食國有陽遂珠趙佗令人航海盜歸番禺僅千載矣甘澤謠陶峴傳浪跡怡情僅三十載撫言曲江之宴長安僅於半空玉壺清話南唐先主傳吳越災遣使唁之賚帑幣糧僅百餘艘之類至宋人始率從少義迄今公用之

令狐子先安陸高士予嘗著之古懽錄矣王彥輔塵史載其著書甚多有萬卷錄易說精義晉年統緯世總樂要注默書讒髓琴譜兵述要輅等若干卷又云令狐先

生卒阮逸天隱表之林逸書孟逸篆額號三逸碑

南齊侍中庾杲之家貧每食生韭熟韭韭蒞時人爲之  
語曰孰謂庾郎貧每食二十七種後魏陳留侯李崇爲  
尚書令性儉慙食止韭蒞其客李元佑戲語人曰李令  
公一食十八種問其故答曰二九一十八二事極相似  
梅村詩話云嘗與陳卧子共宿問其七言律詩何句最  
為得意卧子自舉禁苑起山名萬歲複宮新戲號千秋  
一聯然予觀其七言殊不止比如九龍移帳春無草萬

馬窺邈夜有霜左徒舊宅猶蘭圃中散荒園尚竹林禹  
陵風雨思王會越國山川出霸才石顯上賓居柳市竇  
嬰別業在藍田七月星河人出塞一城砧杵客登樓四  
塞山河歸漢闕二陵風雨送秦師諸聯沉雄瑰麗近代  
作者未見其比殆冠古之才一時瑜亮獨有梅村耳

彈碁之戲始見西京雜記後漢梁冀傳注稍詳之似近  
投壺而其製不傳今人詩多以奕碁當之可發一笑王  
建宮詞云彈碁玉指兩參差背局臨虛闕著危先打角

頭紅字落上三金字半邊垂讀之亦不能通曉也

揮塵新談記費鶯湖初第謁彭文憲文憲曰殿上金堦滑須慢慢行吾鄉高念東侍郎珩有句云金堦路滑且徐行本此

唐蕭倣咸通四年知禮部貢舉責授蘄州刺史有與浙東鄭大夫書云韓綰即文公之孫柳告是柳州之子鳳毛殊有而名字陸沉皆倣是年所舉士也

千里馬人皆知之王兆雲湖海搜奇載陝西民家有千

里驢腰有腎六又張翁言有友人省親山東親家以一驢至曰此千里驢也乘之倏忽抵家

唐人五言絕句往往入禪有得意忘言之妙與淨名默然達磨得髓同一闕捩觀王裴輞川集及祖詠終南殘雪詩雖鈍根初機亦能頓悟程石臞有絕句云朝過青山頭暮歇青山曲青山不見人猿聲聽相續予每嘆絕以為天然不可湊泊予少時在揚州亦有數作如微雨過青山漠漠寒煙織不見秣陵城坐愛秋江色山青蕭條



秋雨夕蒼茫楚江晦時見一舟行濛濛水雲外

江上雨後

明月來照見下山路人語隔溪煙借問停舟處

惠山下鄒流峙

訪通山堂振法鼓江月掛寒樹遙送江南人鷄鳴峭帆去

焦山曉起送龜臺還京口又在京師有詩云凌晨出西郭招提過微

雨日出不逢人滿院風鈴語

早至天寧寺

皆一時佇興之言知

味外味者當自得之

南昌陳士業

宏緒

言嘗登泰山日觀峰四更起候日出見

霞彩萬道碧綠交加有赤盤從中涌出晃漾不定久之

乃成日輪因悟氣至此始聚而為日日生一日非以昨日之日復為今日之日也新吳宋長庚亦有此論此說甚奇山海經云義和二國名每日出二國人為御推升太虛語尤荒誕可笑

七言律聯句神韻天然古人亦不多見如高季迪白下有山皆遶郭清明無客不思家楊用修江山平遠難為畫雲物高寒易得秋曹能始春光白下無多日夜月黃河第幾灣近人節過白露猶餘熱秋到黃州始解涼瓜

步江空微有樹秣陵天遠不宜秋  
釋讀徹一夜花開湖上路半春  
家在雪中山皆神到不可湊泊

錢武肅王目不知書然其寄夫人詩云陌上花開可緩  
緩歸矣不過數言而姿制無限雖復文人操筆無以過  
之東坡演之為陌上花三絕句云陌上花開蝴蝶飛江  
山猶是昔人非遺民幾度垂垂老遊女還歌緩緩歸五  
代時列國以文雅稱者無如南唐西蜀非吳越所及賴  
此一條足以解嘲

韓蘇七言詩學急就篇句法如鴉鵂鷹鵬雉鵠鷗駝駟駟駟駟駟等句予既載之池北偶談近又得五言數語韓詩蚌螺魚鼈蟲虛全鰻鱸鮎鯉鱖鵠鵠鷗鵠鵠鵠蔡襄弓刀甲盾弩筋皮毛骨羽然此種句法間作七言可耳五言即非所宜解人當自知之

武林女子王倩玉貌甚美而工詩詞已字人矣悅其中表沈生適聲而越禮焉母家訟於官杭守戈珽斷離鵠於駐防旗下沈百方贖歸復為沈生一女而死傳其寄

沈長相思一闋云見時羞別時愁百轉千回不自由教  
奴怎罷休懶梳頭怯凝眸明月光中上小樓思君楓葉  
秋雖淫奔失行其才慧亦尤物也

癸未正月十六日

大駕南巡視河工

上諭官民人等及革職降級官員贖罪人犯願赴山東  
被災地方泰安州沂州新泰蒙陰郯城等縣賑濟饑民  
者列名以聞事畢議叙

會試總裁官東閣大學士兼禮部尚書熊賜履吏部尚書陳廷敬吏部右侍郎兼掌翰林院事吳涵禮部右侍郎許汝霖

本朝惟高陽李文勤公三典會試今孝感熊公以癸丑甲戌丁丑庚辰癸未五典會試澤州陳公以壬戌辛未癸未亦三典會試可謂盛事按明二百七十年惟金谿王公英永樂戊戌宣德庚戌正統壬戌三典會試耳

臺灣風信與他海殊異風大而烈者為颶又甚者為颶

颶倏發倏止颶常連日夜不止正二三四月發者為颶  
五六月八月發者為颶九月則北風初烈或至連月為  
九降過洋以四七十月為穩以四月少颶七月寒暑初  
交十月小春天氣多晴暖故也六月多颶九月多九降  
最忌颶颶俱多挾雨九降多無雨而風凡颶將至則天  
邊有斷虹先見一片如船帆者曰破帆稍及半天如鬣  
尾者曰屈鬣土番識風草草生無節則一年無颶一節  
則颶一次多節則多次颶之名以時而異正月初四日

曰接神颶初九日曰玉皇颶十三日曰關帝颶念九日

曰烏狗颶二月二日曰白鬚颶三月三日曰上帝颶十

五日曰真人颶念三日曰馬祖颶

真人多風馬祖少雨

己上春三

月共三十六颶此其大者四月八日曰佛子颶五月五

日曰屈原颶十三日曰關帝颶六月十二日曰彭祖颶

十八日曰彭婆颶念四日曰洗炊籠颶七月十五日曰

鬼颶八月一日曰竈君颶十五日曰魁星颶九月十六

日曰張良颶十九日曰觀音颶十月十日曰水仙王颶



念六日曰翁爹颶十一月念七日曰普菴颶十二月念

四日曰送神颶念九日曰火盆颶念四日已後皆曰送

年風

按升菴先生云  
颶當作颶音只

鳳山縣有薑名三寶薑相傳明初三寶太監所植可療

百病

諸羅縣番首名大耆者每歲東作時諸番請其出射射  
所及之地稼輒大熟號靈箭

正月二十七日前少傅兼太子太傅保和殿大學士兼

禮部尚書王熙卒公禮部尚書文貞公崇簡長子也順治丁亥進士父子同官禁林又同為學士康熙壬戌以兵部尚書大拜居政府者二十年辛巳以病予告至是卒年七十六

賜謚文靖

王文貞公六子長熙保和殿大學士禮部尚書次樞桃源縣知縣次然廣西布政使司布政使次熙浙江金華道叅議次燕貴州巡撫都察院副都御史次默刑部郎

中閥閱之盛時無其比

二月二十九日放榜會元王式丹

江南實  
應人

康熙中以尚書拜相者或進部銜如宛平王胥度

熙相

國以司馬大拜而進兼禮部尚書京江張素存

玉

相國

以宗伯大拜而進兼戶部尚書是也其後吳沁州銅川  
典以刑部尚書大拜止兼本部

浙江巡撫張泰交以士民公籲請前巡撫陞浙閩總督  
諡忠貞范承謨春秋特祀允行

湯調鼎淮之清河人順治初進士著辨物志議論多發人神智偶筆其記人參二則於此隋高祖時上黨民宅後閭人呼聲求之得人參一本根五尺餘具體人狀占者謂晉王陰謀奪宗故妖草生予曰非妖也人參如人形者食之得仙根至五尺而具人狀蓋歲久神靈之物而上黨又人參之所出惜時無張華其人故其物不著而以為陰謀奪宗之應文帝以丞相僭帝位何嘗不以陰謀得哉又元覽云人參千歲為小兒枸杞千載為大

子按參以人名伏土歲久而其體人狀氣類神靈之感  
無足怪者枸杞字不從犬何以歲久為犬廣韻云春名  
天精子夏名枸杞秋名却老根冬名地骨皮是枸杞特  
四名之一考山海經建木上有九橰下有九枸枸根盤錯  
也與犬義絕不相涉使枸杞而為犬天精却老地骨皮  
又何化乎

人參  
譜

呂與叔記二程子語云今日釋氏未消理會大患者在  
介甫之學譬之盧從史在潞朝廷將討之當時便使一

處逐節度使朝議欲討之而李文饒之意必欲先討潞州則不必治彼而自敗今日却要先整頓介甫之學壞了學者

程子云詩小序必是當時人所傳國史明乎得失之迹者是也不得此何緣知此篇是甚意思大序則是仲尼所作要之皆得大意朱子學宗二程子詩序獨不然何也

伯淳道君實語自謂如人參甘草病未甚時可用病甚

則非所能及愚謂熙寧之病已甚溫公出而立起膏肓  
天下更生天不祚宋遂使公年不永豈云非所及哉

三月十五日

上南巡視河間

宮內閣九卿迎

駕於南海子西紅門

四川巡撫貝和諾請復設蜀省五十七學學官下禮部  
議覆得

俞旨允行

謝在杭肇湖小草齋詩話殊多憤憤啓發人意處絕少如云詩境貴虛故仙語勝釋釋語勝儒夫仙語如步虛辭等最易厭釋語入詩最近雅今乃反之豈非強作解事者惟所云王右丞律選歌行絕句種種臻妙圖繪音律獨步一時尤精禪理晚居輞川窮極山水園林之樂唐三百年詩人僅見此耳如云明詩遠過於宋又云本朝僅數名家力追上古然刻畫摹擬已不勝其費力矣



其他作者雖復如林上乘雋語人不數篇要其究竟尚不及宋宋人有實學而本朝多剽竊故也右二條自相矛盾當以後論為允又云國初詩林鴻高啓尚矣鴻一意盛唐而啓雜出元白長吉夫鴻之為盛唐厲鼎耳安得與啓並稱而且語有軒輊此真齊人之知有管晏而已又云李西涯樂府野狐外道夫西涯樂府雖變體自是天地間一種文字弇州晚年尚爾服膺遽斥之為野狐外道可乎約略駁正數端以例其餘至外篇雜篇以下

多載晚唐五代宋元詩無可采者正與劉後村詩話同耳

三月十八日

萬壽節大赦天下

十九日赴

暢春苑啓奏刑部釋放囚犯八百餘人是日請

旨

御批又減等二十一人

二十六日已刻

文華殿經筵滿禮部尚書席爾達漢禮部尚書韓茨進  
講知者樂仁者壽二句滿吏部左侍郎傅繼祖漢詹事  
府詹事徐秉義進講易經其德剛健而文明三句講畢  
賜宴太和門

上南巡畿輔在籍諸臣迎

駕

詔復原任禮部右侍郎田種玉國子監司業劉芳詰御

史戈英原官至江南

詔起用原任河南巡撫侍郎顧汧翰林編修楊瑄加檢  
討尤侗侍講復內閣學士盧琦諭德秦松齡檢討潘耒  
徐鉉馮勗御史吳震方等原官

特賜江南舉人汪灝何焯蔣廷錫三人與癸未科會試  
中式舉人王式丹等一體

殿試

宋中丞牧仲得王介甫唐百家詩選殘本自第五卷王

昌齡李頎起至第八卷錢起盧綸司空曙止又自十三

卷王建起

建詩二卷  
選上卷

至十六卷許渾止中間第六卷沈

千運已下全取元次山篋中集而益以李嘉祐等七人  
通三十八家蓋亦詳於中晚而略於初盛宋人選唐詩  
大概如此意初唐盛唐諸人之集更五代亂離傳者較  
少故也牧仲謂今所傳十卷是章安楊蟠所改竄非介  
甫元本此雖闕本而真面目尚在山陽閻百詩若云曾  
見閻賈持翻刻本正二十卷惜無從覓之近牧仲有書

至云已購得全本方刻之吳門云

三月二十五日

特命皇長子臨故少傅大學士王熙之喪拜奠舉哀  
特恩異數都人驚傳以為未嘗有也

上諭以

世祖皇帝舊臣故加殊禮內閣部院諸臣公疏謝

恩報聞

四月初四日

殿試初七日傳臚狀元王式丹

會元

江南寶應人榜眼趙

晉福建閩縣人探花錢名世江南武進人是科以違式

黜者三人

吳時寬沈洪雷曾

十五日引見癸未科進士選汪灝等四十九人為庶吉士與鼎甲三人同入館讀書

十二日在

暢春苑

御試庚辰科鼎甲汪繹等及庶吉士十七日

命下留館授職者十三人顧圖河

甲戌一  
甲第二

汪繹季愈皆

鼎甲餘庶吉士滿漢共十人

戊辰庶吉士梁佩蘭張尚  
璣辛未庶吉士狄億皆外

用外用者共

三十一人

東閣大學士兼吏部尚書熊賜履以老病請告先之仍

令居京師備

顧問

以吏部尚書陳廷敬為文淵閣大學士兼吏部尚書

以副都御史勵杜訥為刑部右侍郎刑部侍郎金璽以



前任湖廣巡撫紅苗事調用

以直隸巡撫兵部侍郎李光地為吏部尚書管巡撫事

鄭縣同年史及起少宗伯前身為僧大成予既書之池  
北偶談第二十六卷癸未二月與同年屠少司馬芝岩

釋會於僧舍屠亦鄭人也因訊及史事屠言其邑人戎

通叅上德前身亦僧也嘗以鐵鍊鎖項募緣市中通叅  
之父戎翁者嘗施齋供與之善後僧化去而通叅以是  
日生亦夢僧入其室按宋相史彌遠乃覺長老後身即

宗伯之先也

唐武后遊石淙倡和詩首御製自皇太子相王以下和者十六人相王之後次梁王武三思次內史狄仁傑次奉宸令張易之麟臺監中山縣開國男張昌宗又次鸞臺侍郎李嶠鳳閣侍郎蘇味道夏官侍郎姚元崇奉宸大夫汾陰縣開國男薛曜書久視元年五月刊於平樂觀之北崖諸詩惟李嶠沈佺期二篇差成章餘皆拗拙可資笑柄耳黃岡葉井叔封知登封縣撰嵩陽石刻集

記始著錄之而刪去九首不為無見而朱竹垞太史憾其闕略以得覩全碑為喜則亦好奇之過也當牝朝淫昏之世二張每侍行幸預倡和已令千古齒冷而列儔於李嶠蘇味道輩之前諸人亦俯首甘之當時君臣上下豈復知有羞惡之心哉

文海披沙記筆之異者鍾繇張芝王右軍皆用鼠鬚歐陽蘭臺用狸毛為心蕭祭酒用胎毛為柱張茂先用鹿毛陶隱居用羊鬚鄭虔謂麝毛一管可書四百紙狸毛

可書八百紙又有豐狐螭蛉龍筋虎僕及猩猩毛狼毫雖奇品而醇正得宜不及中山兔毫若淇源之鴨毛雀雉毛但取五色相間為觀美耳今吳興兔毫佳者直百錢羊毫僅二十分之一貧士多用之然柔而無鋒臧懋循欲取貂鼠毛為之輔以兔毫謂鍾王所用鼠鬚必此也然稍肥舉落運用不如人意已上謝在杭所記備矣近日湖州專用羊毛殊柔輒無骨形貌亦醜貂鼠珍貴專為貴人裘帽之用筆工當何從購之

李滄溟食饅頭欲有蔥味而不見蔥唯蔡姬者所造乃食其法先用蔥不切入餡而留饅頭上一竅候其熟即拔去蔥而以麪塞其竅此謝在杭文海披沙所載即所謂蔡姬典盡舊羅裙者也

揚州銀杏樹內有觀音大士像寧波波迦山石有大士竹林鸚鵡像予皆載之池北偶談閱文海披沙一則云永州蘇山多石淋以水鋸破中有觀音彌勒寒山拾得等像西方聖人神道設教理或然也

吾鄉風雅盛於明弘正嘉隆之世前有遼尚書華泉後有李觀察滄溟滄溟集盛傳於世華泉集一刺於胡中丞可泉再刺於魏推官允孚又逸橐六卷刺於王方伯桃溪又有李中麓太常選本山西臺察趙侯齋刺於太原予所及見者前三本而中麓選本獨未之見諸本亦漸就漸滅矣康熙己卯予乃選刺於京師凡四卷予兒啓涑以予私淑先生之切也移書宗姪華訪其後裔久之華乃詳其家世報涑曰先生二子長子翼以廕官光

祿寺丞其後無聞次子習歷城諸生字仲學號南洲有詩名習子治禮治禮子節節子庶皆以諸生奉祀事庶子材材子紹祖自先生至紹祖凡七世其家尚有先生畫像云先生祀郡邑鄉賢其奉祀至材始失之材今年老為人佃田紹祖始十餘歲亦失學傭工辛巳予假歸洊乃為予述之而濟南諸生某某以書導材攜紹祖及先生畫像謁予里第比予過郡因與巡撫王中丞東侯提學徐僉事章仲備言先生名德而後裔僅有存者遂

以紹祖奉先生祀焉

先生墓在萊莊亦華云

黃子鴻名儀常熟人隱居博學工書法予刻漁洋續集將仿宋槧苦無解書者門人崑山盛誠齋侍御升符聞子

鴻多見宋刻獨工此體因禮致之子鴻欣然而來都無厭倦今續集自首迄尾皆其手書也尤工小詞有句云井桐休放月痕來玉堦剛臥金鈴夫人多稱之

安丘劉憲石相國

正宋

好為詩嘗賦從軍行云匣裏雙雄

劍腰間兩石弓蓬蒿真浪死何必怯遼東後竟以事隸



旗下人以為詩識

江南蘇松糧儲道叅議馬逸安疏言臣父瑯原任永嘉縣知縣康熙十三年值逆藩耿精忠之變與溫處道臣陳丹赤恪守臣節同時殉難荷蒙

皇恩矜恤屢下

溫綸從優議叙贈臣父浙江布政使司叅政廕一子入監併

賜葬祭康熙三十六年撫臣疏請於溫州府建雙忠祠

復荷

俞允先是三十五年丹赤蒙

特恩賜諡三十八年

皇上南巡幸浙丹赤子湖州府知府一夢恭迎

聖駕復荷

軫念

御書扁額懸之忠祠榮被萬世臣父環殉難與丹赤同

時

賜祠又復同祀仰懇

皇上破格一體

賜諡賜額昭垂萬世云云禮部議覆奉

旨馬瑯著與諡旋

賜諡忠勤

抵腕二獸名秉心忠直今承天門內華表頂上者是又  
衛輝府前石亦是按此亦蒲牢屬肩蚩吻睚眦之屬而  
龍生九子不載其名

世傳羿妻奔月謂之嫦娥亦曰蟾蜍又酉陽雜俎月中  
有一人斫桂樹名吳剛又云月中仙人名宋無忌何月  
中人物之紛紛耶又鬱華一名鬱儀奔日之仙結璘奔  
月之仙見七聖記

鈕玉樵

琇

云有王秋山者工為拏畫凡人物樓臺山水

花木皆於紙上用指甲及細針拏出設色濃淡布境淺  
深一法古名畫按拏當作玃音葉字書以手拏物也近  
聞中有織畫乃破紙為條織成之山水人物花鳥布置

設色種種臻妙與刺繡無異亦奇技也

南海友人陳元孝

尹恭

作狨賦其文甚工予按陸佃云狨

尾作金色俗謂金線狨一名獠獠獠猴也楚人謂之沐  
猴甚愛其尾毛柔長可藉宋制官二品狨坐不言食猴  
又按石獠獸名食猴則元孝之賦當作石獠為是獠音  
菊異物類苑云獠如師子蒼黑色瞑目聳耳出武當山  
又黃山志盧狄似穿山甲而無鱗嗜獠及蜂每呼羣獠  
至羅跪於下擇肥者以木葉覆其頂而食之

山海經何羅魚出譙明山譙水中聲如吠犬食之已瘧  
今登萊海上三月何羅魚始至味甚美即寧波之鯊也  
谷音三卷皆宋末人詩上卷王澹以下几十人率任俠  
節義之士下卷詹本以下凡十五人則藏名避世之流  
也番陽布衣瀟湘漁父以下五人不可得其姓字要之  
皆宋之逸民也其詩慷慨激烈古澹蕭寥非宋末作者  
所及是時謝臯羽林霽山輩皆以文章節義著於東南  
而又有此三十人者與之遙為應和亦奇矣此書毛氏

汲古閣本與月泉吟社合刻最工亡友施愚山備兵湖  
西又嘗刻之清江蓋杜清碧其郡人也適見黃少司馬  
雪洲集記此書初得之臨淮顧德光氏後又見江西刻  
本多帝虎陶陰之憾間託南都博洽之士是正稍復其  
真虞部主事吳時冕見而愛之遂刻諸真州分署以傳  
知弘正以來此書蓋不一刻矣集中諸人本末各有耿  
耿不沒者宜有神物在在護持之也黃名瓚字公獻揚  
之儀真人

五月十五日

朝退

御乾清門

賜滿漢大學士尚書侍郎

御書扇各一十禎得

御製虎丘五言律詩一首

前有楊春小印後有康熙宸翰稽古右文二印

素海叟詩集若干卷康熙壬午雲間門人周庶常桑策

銘所寄鈔本用羅紋箋寫之甚工有大復空同二序陸



儼山序又董宜陽題編首謂海叟手定國初刻於張氏者久燬儼山編次為別本而陸序云海叟集舊有刻又別有選行在野集者暇日與獻吉共讀之又刪次為今集云按明初詩人共推高季迪為冠而大復獨以海叟為冠空同許為知言今讀其詩古詩學魏晉近體學杜皆具體而微耳遽躋之青丘生之列未免失倫故予謂從來學杜者無如山谷山谷語必已出不屑裨販杜語後山簡齋之屬都未夢見况其下如海叟者乎

詩小序必不可廢古今通儒論皆如此然如郝楚望之  
每一詩必駁朱注亦自不可常熟顧大韶仲恭欲刊定  
一書用毛傳為主毛必不可通然後用鄭毛鄭必不可  
通然後用朱毛鄭朱皆不可通然後網羅羣說而以已  
意折衷之嚴粲詩緝作於朱注之後獨優於諸家大全  
之作數衍朱注全無發明用覆瓿可也此論最公

見顧

仲子  
傳

益都孫文定公止亭

足銓

嘗撰顏山雜記四卷極稱簡括

然於建置設官緣起猶未詳按黃瓚雪洲集議礦盜一  
疏是瓚巡撫山東時所奏略云臣會同鎮守太監黎鑑  
巡按山東監察御史王相徐冠議照禦盜之法本非一  
端要在術以防之令以禁之嚴逐捕以銷之足衣食以  
安之而已前項礦賊勢雖頗衆其初實倡於一二不逞  
之徒而市井無賴與凡窮困無聊者遂相率而從之臣  
等查得青州府益都縣去郡二百餘里地名顏神鎮土  
多煤礦利兼蜜冶四方商販羣聚於此其中時有不逞

之徒此巡海道副使潘珍先有開立縣治之議今有特設通判之請固欲得其要害而治之誠有見也但鄰近州縣復多徒黨亦未得專事乎此而遽遺於彼也合無准照副使潘珍及左布政使姚鏌右布政使盛應期按察使王泰署都指揮僉事馬愷分守左叅政許淳分巡僉事魯鐸所議於益都縣顏神鎮地方聽令壘石為堡建立府館一所添設捕盜通判一員許其兼制前項鄰近州縣舊有礦洞不時巡察新編總甲嚴為約束操練

弓兵民快人等遇有盜賊小則密謀發卒以收掩捕之  
效大則移文糾衆以成合擊之功務在斷絕奸盟毋令  
復相屯聚示已往於不究開方來以自新則賊黨自此  
可消矣云云紀略以為正德十二年巡按御史黃某奏  
請兵部覆准蓋未詳也但黃疏有聽壘石堡之語而顏  
城實嘉靖三十六年王弇州世貞兵備青州時建則正德  
中止設官而未建城耳

黃雪洲同畢嘉會送馮憲副還浙一首廣陵淹畢誠越

山老馮唐兩賢師友間力障波瀾狂翩翩遊子衣獨與  
朔鴈翔汲古尚董井銷魂更雷塘胡然歌式微綵服戀  
故鄉驚心濟南叟桃李空門墻江蘼未堪折遠思憑誰  
將嘉會吾邑大司空畢公亨也公官兩淮運使為茶陵  
李相所重卒為名臣止從釣臺集得其一詩餘不槩見  
偶閱黃集錄之備公故事云

余自少年與先長兄考功同上公車每停驂輟輶輒相  
倡和書之旗亭驛壁率不留橐諸同人見之者後在京

師往往為余誦之恍如昨夢近見吳江鈕玉樵考齋牘  
亦載余逸句因憶丙午自里中北上戲題德州南曲律  
店壁一絕云曲律店子黃河厓亦地名朝來一雨清風灑  
青松短壑不能住騎驢又踏長安街語雖詼嘲不足存  
亦小有風趣聊記於此

今京師宴席最重鹿尾雖猩唇駝峰未足為比然自唐  
已貴之陳子昂廕尾賦云卒網羅以見逼受庖割而惟  
傷豈不以斯尾之有用而殺身於此堂為君雕俎之羞

厠君金盤之實云云若六朝已來則以麈尾為談柄耳未聞充盤俎也耶律楚材西域詩亦以鹿尾駝蹄作對

韓宗伯莢所居在宣武門外與胡侍講任輿為鄰韓逝未浹月胡亦病卒胡甲戌狀元也乙丑狀元陸侍講肯堂先卒於此宅陸是科會元胡甲子江南解元皆兩掄元樊川詩云家住城南杜曲旁兩株仙桂一時芳禪師都未知名姓始信空門意味長諒哉

括異志述吳地記云昔有金牛糞金村民臯伯通逐之



牛入山穴山顏兄弟皆死妄語無稽豈又一金牛耶又一臯伯通耶吳地記又云漢議郎臯伯通字奉卿卒葬胥門號伯通塢則伯通非村民又不死於山矣

古今論世者以尹吉甫為名臣徒以伐獫狁及崧高烝民韓奕江漢四詩耳吾獨疑吉甫惑後妻之言至使其子伯奇衣苔帶藻作履霜之操此與晉獻驪姬之事何異夫不能齊家而妄稱之曰萬邦為憲吾不信也其猶後世詞人之諛韓侂冑賈似道者動以伊周擬之其又

足信乎

姚士麟叔祥言曾見趙松雪自書家用薄運筆精妙凡養蠶種桑等事與今不殊惟用麪作食及烏豆之類動至百斤百石耳

姚叔祥又言海鹽有優兒金鳳以色幸於嚴東樓非金則寢食弗甘金既衰老而所謂鳴鳳記盛傳於時於是金復塗粉墨扮東樓馬此一事較侯方域馬伶傳更奇

見只編云蘭谿魏某嘗客華州王槐野祭酒家見架上

有夏國書凡閱三旬始遍則此書較契丹志金志卷裱尤多矣右二志予皆有鈔本夏國志則世罕知之

明代自南部入閣者甚少惟萬厯丁未葉文忠向高以南京吏部侍郎徑授禮部尚書東閣大學士文忠是時年四十九

鄭端簡古言云永叔毀繫辭君實詆孟子安石非春秋二程子改古大學晦菴不用子夏詩序皆不可解

香祖筆記卷二

欽定四庫全書

香祖筆記卷三

刑部尚書王士禎撰

陳子昂文集十卷詩賦二卷雜文八卷與陳氏別傳及  
經籍志合子昂五言詩力變齊梁不須言其表序碑記  
等作泔襲頽波無可觀者第七卷上大周受命頌表一  
篇大周受命頌四章曰神鳳曰赤雀慶雲此頌其辭諛  
誕不經至云乃命有司正皇典恢帝綱建大周之統歷

革舊唐之遺號在省天下咸與維新賜皇帝姓曰武氏  
臣聞王者受命必有錫氏軒轅二十五子班為十二姓  
高陽才子二八名為十六族故聖人起則命歷昌必有  
錫氏之規云云集中又有請追上太原王帝號表太原  
王者士黻也此與揚雄劇秦美新無異殆又過之其下  
筆時不知世有節義廉恥事矣子昂真無忌憚之小人  
哉詩雖美吾不欲觀之矣子昂後死貪令段簡之手殆  
高祖太宗之靈假手殛之耳

特加在籍原任刑部侍郎任克溥尚書銜任聊城人順治丁亥己丑進士尋卒

予奉使廣州屢見紅鸚鵡又有五色者尤珍麗姚旅云滇中多紅斑鳩又云曩宮中有黃鸚鵡屠長卿詩云一入雕籠奪翠裳羽毛新得染鵝黃此與漢赤鴈朱鷺隋宦官劉繼詮獻芙蓉鷗皆異物也

熊掌最難熟故楚靈王請食熊蹯而死明秦府王孫不羈云用草繩匝掌煮之則易熟

今世公卿士大夫下逮與隸婦女無不嗜煙草者田家  
種之連畝頗獲厚利考之本草爾雅皆不載姚旅露書  
云呂宋國有草名淡巴菰一名曰金絲煙氣從管中  
入喉能令人醉亦辟瘴氣搗汁可毒頭強初漳州人自  
海外攜來莆田亦種之反多於呂宋今處處有之不獨  
閩矣

山水豹通身作山水紋故名萬厯乙卯上高縣人得一  
虎身文皆作飛鳥走獸之狀



我嶠瓦屋山出貌貅常誦佛號予隴蜀餘聞載之雅州  
傅良選進士云其鄉蔡山多貌貅狀如黃牛犢性食虎  
豹而馴於人常至僧舍索食

獨獸名似猿而大能食猿猿性羣獨性特猿鳴三獨鳴  
一見五侯鯖

宣和畫譜所載最古者吳曹弗興耳畜獸首晉史道碩  
按西京雜記漢元帝時有安陵陳敞新豐劉白龔寬竝  
工為牛馬飛鳥下杜陽望樊育尤善布色皆與毛延壽

同誅然則畜獸花鳥之類漢已多有不獨文翁石室畫  
古聖賢像而已若山水則後起者也

石蛙音劫南越志云形如龜甲

或云脚

遇春雨則生花石丞

詩來經石蛙春字非起韻也古人字無虛設如此

自同州四十里至肅州東望大山金人云此新羅山其中  
產人參白附子與高句驪接界見許亢宗行程錄云  
議政大臣管侍衛內大臣一等公費揚古

諡襄壯

康熙四十年九月二十三日

多羅平郡王納爾福

諡悼

康熙四十年九月二十三日

鑲白旗漢軍都統雷繼尊

諡敏懋

康熙四十年十月十一日

和碩簡親王雅布

諡修

康熙四十年十一月十三日

和碩顯親王丹臻

諡密

康熙四十一年六月二十三日

都統管九門步軍巡捕三營統領凱音布

諭肅敏

康熙四十一年閏六月十七日

福建陸路提督總兵官左都督贈太子少保王萬祥

諭敏壯

康熙四十一年閏六月十七日

浙江永嘉縣知縣殉難贈布政使司叅政馬璟

諭忠勤

康熙四十二年四月二十六日

太子少傅禮部尚書保和殿大學士致仕加少傅王熙

諡文靖

康熙四十二年五月初四日

吏部尚書文華殿大學士致仕伊桑阿

諡文端

康熙四十二年七月二十一日

廣西富川知縣殉難贈太僕寺少卿劉欽鄰

諡忠節

康熙四十三年

閏月

日

以副都御史陳論為刑部右侍郎

海寧人辛丑甲辰進士

王彥輔廬史云予在開封時長子渝遊相國寺得唐潭  
州刺史張登文集一冊六卷權文公為之序其略曰詩  
賦之外誌記書序等合為一百二十篇彥輔又云所得

書肆鏤本纔六十六篇已亡其半矣予續文粹登之文  
以至金石所傳哀而錄之以廣前集惜彥輔之書亦無  
傳

古剔犀器以滑地紫屏為貴底如仰瓦光澤而堅薄色  
如膠棗曰棗兒犀元時禾郡西塘楊滙所作

漢僧徒著赤布僧迦梨鉢陵僧衣色仿西竺宇文周忌  
聞黑衣之識易以黃色衣褐亦起於宇文

鄭康成尚書中候注云比目魚一名東鱖見紺珠集

內鄉李子田蓀撰宋藝圃集二十二卷凡二百八十人  
時在隆慶初元海內尊尚李王之派諱言宋詩而予田  
獨闡幽扶異撰為此書其學識有過人者然於宋初載  
廖融江為沈彬孟賓于之流皆五代人也又取馬定國  
周昂李純甫趙沍麗鑄史肅劉昂霄諸人皆中州集所  
載金源之產定國又劉豫偽翰林學士也而與平園誠  
齋石湖放翁等并列淄澠混淆所宜刊正

華州郭宛委宗昌嘗從遼左得倭帥豐臣書一紙書間

行草古雅蒼勁有晉唐風是朝鮮破後求其典籍之書也鱗介之族乃能好古如此王弘撰山史云

東嘉趙士楨字常吉能詩工書明文華殿中書一日出內府藏硯悉刻前代年號命士楨改製刻萬曆字內有一硯乃唐文皇賜虞世南者士楨奏云太宗賢主世南名臣乞留此硯以彰前代君臣相與之美從之

漱石間談云成都有耕者得薛濤墓棺懸石室中四圍環以彩牋無慮數萬顏色鮮好觸風散若塵霧夫濤死



而以牋殉牋在地下歷千年不壞皆理之不可信者殆好事者為之耳

兩廣雲貴多有毒蟲飲食後咀嚼當歸即解

葉蒲州南岩傳治刀瘡藥方端午日取韭菜搗汁和石灰杵熟為餅用敷瘡處血即止即骨破亦可合奇效

劉脊虛盛唐詩人之傑李華作三賢論論脊虛與元德秀蕭穎士曰劉名儒史官之家兄弟以學著稱述詩書禮樂春秋為五說條貫源流備古今之變劉在京下嘗

寢疾太尉房公時臨扶風聞之通夕不寐謂賓從曰挺  
卿日若不起無復有神道尚書劉公每詣與談終日忘  
返嘆曰聞劉公清言見皇王之理矣殷直清有識尚恨  
言理少對未見劉面常想見其人渤海高適達夫落落  
有奇氣是皆重劉者也又云元罷魯山終於陸渾劉避  
地逝於安康蕭歸葵先人歿於汝南無復下壽云春虛  
學行蓋不僅詩人之冠冕惜不槩見於後世而所傳五  
言亦止十四篇新舊唐書儒學文苑皆不為春虛立傳

與韋蘇州同一憾事

春虛字批柳  
今亦無知者

唐劉蛻文冢銘自評其文粲如星光如月氣如蛟宮之  
水此喻最妙文冢在今潼川州予康熙壬子曾過之為  
賦一詩唐末古文並稱樵蛻蛻文泉子予所手鐸然不  
逮樵遠甚樵之文在大中時惟杜牧可稱勍敵

吾鄉章丘縣有朮氏乃金南渡奸相朮虎高琪之後  
歸潛志載劉勲少宣濟南詩云舟行著色屏風裏人在  
回文錦字中勲初名訥字辯老雲中人

金翰林學士趙秉文嘗述党承旨懷英論詩云律詩最難工五十六字皆如聖賢中有一字不經鑪錘便如一屠沽兒廁其間也按此五代人劉昭禹語党述之耳

大唐傳載開元東封有太原人于伯隴者年一百二十八歲兩孫隨之各年七八十矣詣闕引見自言臣神堯皇帝之臣也上賜紫袍牙笏優卹有加

唐時知貢舉皆預定親知權要皆得薦其私人乃至榜帖亦屬他人為之如撫言所載鄭顥託崔雍為榜延至

榜除日待榜不至但遣小僮壽兒者傳云來早陳賀日  
暮壽兒寄宿院中夜已艾壽兒以蠟九進顯即榜也主  
司在院而榜自外來且使命出入更無關防已可笑尤  
可異者杜黃門第一榜第三場庭叅之際謂諸生曰未  
有榜帖尹樞年七十餘獨趨進公欣然延之從容授以  
紙筆樞每劄一人則抗聲斥其姓名列庭聞之皆咨嘆  
嗟其公道唯空其元公覽讀致謝訖乃以狀元為請樞  
曰狀元非老夫不可公大奇之即命筆親自劄之狀頭

出於舉子自定殆近兒戲矣又鄭損舍人為主司以陸康為狀元帖皆請康自定

范傳正作李翰林墓碑云與賀監汝陽王崔宗之裴周南等八人為酒中八仙周南之名杜酒中八仙歌無之唐書白本傳所載酒八仙人亦與杜詩同

唐文宗太和中詔以李白歌詩張旭草書裴旻劍舞為三絕命翰林學士為之贊僖宗廣明元年車駕幸蜀詔曰行在三絕右散騎常侍李潼有曾閔之行職方郎中

孫樵有揚馬之文前進士司空圖有巢許之風列在青  
史以章有唐中興之德唐代留意風雅如此談之芥人  
齒類

風俗通漢有太守顧先井音膽有井春今誤作井春近  
在部見爰書有妙姓島姓盤姓民姓纏姓杵姓到姓律  
姓茶姓煙姓穰姓首姓卑姓威姓氷姓坎姓榻姓攬姓  
慈姓

章八元賦慈恩塔詩元白見之云不意嚴維出此弟子

其詩鄙惡俚俗予於居易錄已言之姚園客乃以為盧  
照鄰作又似無目人語矣

李格非文叔易安之父也嘗著洛陽名園記不見其詩  
露書載其臨淄懷古絕句云擊鼓吹竽七百年臨淄城  
闕尚依然如今只有耕耘者曾得當時九府錢頗可誦  
京山李東白者能詩隱於衣工有登黃鶴樓七律最佳  
其中二聯云興饒老子胡牀上秋在仙人鐵笛中鄂渚  
霜花沿岸白漢陽楓樹隔江紅明詩諸選多錄歐大任



青衣李英詩而不及東白因著之李宗伯本寧嘗識其  
人後舟過雲夢吟詩拍手一笑躍入水苑

蜀青城山有牡丹二株皆高三十丈號大將軍小將軍  
見元人題跋朱圖南謂在羊亘見峭壁上秋海棠高丈  
餘吐花如錦連綿十里尤奇又玉堂嘉話云海州東峽  
島生海棠作矮樹花深紅大如茶盃香韻殊絕每歲進  
御以金牌記之

治難產方用杏仁一枚去皮一邊書日字一邊書月字

用蜂蜜黏住外用熬蜜為丸滾白水或酒吞下此方乃

異僧所傳

露書

中州才士近有襄城李來章禮山劉青藜太乙劉歌詩  
李古文皆有可傳劉庚辰公車至京師杯酒間為余言  
邠縣全軌車同詩文皆擅絕壬午全寄余長句瀏灘頓  
挫與劉勅敵也因語巡撫少司馬徐公青來湖門人張  
侍御遂若璦聘主大梁書院予昔使秦中偶遊慈恩寺  
見塔上康乃心題詩亟為延譽康遂以此知名當世皆

今士人之才而貧者也康亦字太乙其詩曰園廟衣冠  
此內藏野花歲歲上陵香邯鄲鼓瑟應如舊羸得佳兒  
畢六王

杜子美黑白二鷹詩干人何事網羅求南唐元宗謂馮  
延巳云吹皺一池春水干卿何事舊唐書明皇為楚王  
叱金吾將軍武懿宗曰吾家朝堂干汝何事敢迫吾騎  
從此語在前見本紀

五月二十五日

駕幸古北口外避暑

弇州卮言載滄溟在關中過許中丞宗魯伯誠許問今天下名能詩何人滄溟曰唯王元美次則宗臣予相許請子相詩觀之滄溟勃然曰夜來火燒却許面赤而已余嘗嗟之夫子相詩未必能過伯誠即索觀亦屬恒事何至怫然如此又蔡子木入覲酒間自歌其夔州諸作吳明卿輒鼾睡鼾聲與歌聲相低昂歌罷鼾亦止今觀明卿詩品亦未能過子木也文士護前往夜郎王自

大適足為識者軒渠耳厥後蔡巡撫中州吳謫歸德府  
推官與徐子與張肖甫皆為屬官蔡身為行酒曰吾安  
敢有其一以傲三君子哉予未固盛德不知爾時明卿  
當復置身何地特著二事以為文士相輕之戒云

胡應麟作丹鉛新錄藝林學山以馭升菴自負博辯然  
舛譌復不自覺如引三國志關某傳注謂羽欲娶布妻  
啓曹公疑布妻有殊色因自留之按此乃秦宜祿妻與  
布何涉元瑞豈未一檢陳書耶又唐人長安女兒踏春

陽一絕見沈亞之集異夢錄胡止據博異志似未覩沈  
集者田汝成西湖志餘又傳會以為宋人西湖事謂為  
水仙與鳳俱沈湖中則割襲司馬才仲遇蘇小事而為  
之尤可笑

嘉陵江岸有刀鐐山康熙丙子余再使蜀舟過之口占

絕句云晨過赤銅水望見刀鐐山閨中應計日不見橐

砧還

赤銅亦利州水名

盖用古樂府橐砧今何在山上復有山

何當大刀頭破鏡飛上天語也此詩偶逸之未編入雍

益集聊記此

范德機嘗得十字云雨止修竹間流螢夜濺至既復曰  
語太幽殆類鬼作吳正傳師道禮部集一條云聞之危  
太樸昔與先生秋夜不寐微步山中得此二句喜甚且  
曰云云當以他語映帶之因足成此章云右二語果佳  
余少時有句云螢火出潑碧池荷聞暗香故友葉文敏  
訥菴方鵠極喜之取入獨賞集

胡氏經籍會通云燕中書肆多在大明門之右及禮部

門外拱辰門西花朝後三日則移於燈市每朔望并下  
浣五日則徙於城隍廟中燈市歲三日廟市月三日今  
京師書肆皆在正陽門外西河沿餘惟琉璃廠間有  
之而不多見燈市初在靈佑宮稍列書攤自回祿後移  
於正陽門大街之南則無書矣每月朔望及下浣五日  
百貨集慈仁寺書攤止五六往間有秘本二十年來絕  
無之余庚申冬過之有兩漢紀初印本最精又三禮經  
傳通解亦舊刻議價未就旬日市期早過之二書已為



人購去懊恨累日至廢寢食壬午夏見舊版雍錄雕刻  
極工重過之已為人購去矣癸未夏得陳子昂文集十  
卷猶是故物然如優鉢羅花偶一見耳

康熙壬午年吾鄉有少年十餘人自登萊往濟南肩輿  
數籠籠有虎一熊一又一羊六足一犬三足欲觀者先  
以錢投之攫資無算

文殊普賢廝打本釋家語宋叅政錢象祖與史彌遠合  
謀誣殺韓侂冑請和於金時人為之語曰文殊普賢自

金匱山經  
卷三  
闕象祖打殺師王蓋倪胄以太師封平原郡王倭者皆  
稱師王故也可謂善謔

杭州靈隱寺飛來峰有楊建真伽石像嘉靖二十二年  
福清陳仕賢知杭州命斬之田汝成記其事比於申屠  
廸毀曹操之廟頃張御史瑗請平西山碧雲寺魏忠賢  
墓仆其碑碎之有闕名教可並傳也

嘗見一書言今江浙所祀五道邪神乃明太祖伐陳友  
諒陣亡士卒詔令五人一隊得受香火云云而武林聞

見錄又載宋嘉泰中大理寺決一囚數日後見形獄吏  
云泰和樓五通神虛位某欲充之求一差檄言差充某  
神位得此為據可矣如其言經數月東庫人聞樓上五  
通神日夜喧闐如爭競狀吏乃泄前事為增塑一神像  
遂寂然則宋時已有五通之說不自明初始至於決囚  
鑕營偽牒得補神位則其為邪魅昭然矣吳越之人信  
而畏之理不可解宜湯潛菴城碑其土偶投畀湖中也  
唐肅宗賜李輔國香玉辟邪二長一尺五寸香聞數百

步南宋有李大卿者其子娶韓平原之女奩中有香玉師子高二尺五寸精妙無比後歸福邸

支硎山有泉自石罅流出雖大旱不竭相傳支道林遺跡也有賈胡過之坐臥其側凡半月取一玉蟹而去

五侯鯖載薛瓊至孝家貧采薪遇老父以一物遺之曰此銀寶也用四壁土種之銅盆中當得銀如言種之旬日生苗再旬開花花有銀色如鈿螺及結實皆銀也銀亦可種與雍伯種玉皆異聞

米紫來

漢變

宛平人明太僕友石

萬鍾

之孫也父壽都字吉

土亦知名紫來以順治十八年辛丑登第多技藝工書畫書仿南宮尤工金石篆刻以長葛知縣行取適有博學宏詞之舉改翰林編修以典試呈誤久之

召入供奉

內廷遷侍講

賜宅西華門尋病卒太僕有勺園在京城西海淀與武清侯清華園相望亦曰風煙里今

暢春苑即兩園故址也紫來少喜交游所交游皆海內名士與予最相善頗有倡和其詩惜為書畫所掩亦散

佚無傳矣

張耒曾以其洪中詩屬予論次

藥花入詩多新異如陳白沙恰到溪窮處山山枳殼花之類予居易錄載之矣偶讀南宋姜堯章集一絕云憐君歸索路迢迢到得茅齋轉寂寥應嘆藥闌經雨爛土肥抽盡縮砂苗亦佳然以藥闌為藥物之藥則誤耳

唐人柳枝詞專詠柳竹枝詞則泛言風土如楊廩夫西

湖竹枝之類前人亦有一二專詠竹者殊無意致宋葉  
水心又矧為橘枝詞亡友汪鈍翁琬編修亦擬作二首  
其一云郎行時節橘花零南風吹來香滿庭今年橘實  
大如斗勸郎莫羨楚江萍

姜白石詩說有數則可取錄之人所易言我寡言之人  
所難言我易言之難說處一語而盡易說處莫便放過  
僻事實用熟事虛用學有餘而約以用之善用事者也  
意有餘而約以盡之善措辭者也篇中出人意表或反

終篇之意皆妙句中無餘字篇中無長語非善之善者也句中有餘味篇中有餘意善之善者也始於意格成於句字詩有四種高妙一曰理高妙二曰意高妙三曰想高妙四曰自然高妙一篇全在結句如截奔馬辭意俱盡如臨水送將歸辭盡意不盡若夫意盡辭不盡剡溪歸棹是也辭意俱不盡溫伯雪子是也一家之言自有一家風味如樂之二十四調各有韻聲乃是歸宿處樵仿者語雖似之韻則亡矣右論詩未到嚴滄浪頗亦



足叅微言

溫伯雪子曰擊而道  
存見莊子田子方篇

陳忠國字升揆公安人諸生曾中四川鄉試副榜以冒  
籍黜壬午來京師其鬚長過於膝行則自兩肩搭於背  
上每行過市人競隨觀之趙統詩話杭人陸濤言其鄉  
有役為老人者鬚長委地行則辮而繞之頸又白醉璫  
言云攸縣有徐寨主者鬚十餘莖以囊盛之舒之則其  
脩二丈

元鮮于伯機記杭醫宋會之者善治水蠱以乾絲瓜一

枚去皮剪碎入巴豆十四粒同炒以巴豆黃色為度去  
巴豆用絲瓜炒陳倉米如絲瓜之多少候米黃色去絲  
瓜研之為末和清水為丸如桐子大每服百丸皆愈

宋言

巴豆逐水絲瓜象人脉絡去而不  
用藉其氣以引之也米投胃氣也

宋時武林馬塍藏花之法紙糊密室鑿地作坎覆竹置  
花其上糞土以牛溲硫黃然後置沸湯於坎中候湯氣  
薰蒸則扇之經宿則花放今京師園丁亦然予嘗以冬  
月寄諸盆花約明年花樹不敗則酬其直惟桂花不能

如舊西湖志餘謂桂必清涼而後放法當置石洞岩竇間暑氣不到處鼓以涼颼乃開今與桃梅牡丹之屬同置煖室地窖宜其不殖也此亦格物者所當知

從伯文玉諱與玟號能詩嘗有詠宋高宗一絕云千金空買玉孩兒不得其解讀西湖志餘高宗嘗宴大臣見張循王俊持扇有玉孩兒扇墜上識是舊物昔往四明誤墜於水者問俊所從得對曰臣從清河坊鋪家買得之詢鋪家云得之提籃人復詢之乃從候潮門外陳宅

厨孃處得之詢之厨孃云破黃花魚腹中所得也上大悅舖家提籃人補校厨厨孃封孺人

中年縣城南有湖數十畝中有亭額以蒲盧為邑名士

張林宗

民表

觴詠之地予丙子以奉使祭告西嶽過之惜

其命名非典因為易名墊巾以存林宗之舊使後來知名流故蹟按毛詩小宛疏云螟蛉桑蟲也果蠃蒲盧也細腰土蜂謂之蒲盧郭璞爾雅注細腰蜂俗呼蠋螟若水中之蒲其根著在土而浮蔓多緣木故亦或謂之果

羸是細腰水蒲得以互稱於命名之義無一可者不知當時義何居也

予甲子冬奉使祭告南海之神歲杪次桐城大雪中陳默公焯初未相見即過予客署二從者背負巨囊揖罷即呼具案顧從者取囊書數十大冊羅列案上指示予曰此吾二十年來所輯宋元詩會若干卷聞公奉使當過此喜甚將待公決擇之然後出問世耳已過其滌岑雪中遠眺龍眠諸山縱觀是書竟日賓主談諧無一言

及世事此亦冠蓋交游中所少默公順治壬辰進士二甲臚傳第一以耳聾不仕終

予以乙丑二月抵南海始與陳元孝

恭

定交揖甫罷即

出一端石小研相示曰吾得此水坑石甚寶惜之將以梁子藥亭公車之便屬寄公於京師既聞奉使當至粵故留以俟視其側有銘八字云獨漉之貽漁洋寶之元孝工漢隸此其手書也予甚珍之獨漉元孝別字亦自稱羅浮布衣子勵後中己卯舉人

陳衍奇石記云米仲詔嗜石有五石最奇一靈壁石高四寸餘延袤陂陀勢如大山四面皆畫家皴法近山腳特起一臺臺上平下削平處刻伯原二字小篆絕佳伯原元清碧先生杜本字也又一靈壁石非方非圓週遭如屏鄣有脉兩道作殷紅色自凹處垂下如瀑布之射朝日高八寸許圓徑尺純黑凝潤如膏一英德石高四寸長七寸如雙虬盤臥玲瓏透漏千蹊萬徑穿穴鉤連一兗州石大如拳堅緻有聲得之嶧山一仇池石亦如

峯巒洞壑奇巧殊絕刻其側曰小武夷

明大內英華殿供西番佛像殿前菩提樹二孝定皇太后手植也光祿寺志云英華殿四月八日供大不落夾二百對小不落夾三百對叔祖季木考功詩云慈寧宮裏佛龕崇瑤水珠燈照碧空四月虔供不落夾內官催辦小油紅蓋紀此事也慈寧宮當作英華殿為確

荊州南門有息壤其來舊矣上有石記云犯之頗致雷雨康熙元年荊州大旱州人請掘息壤出南門外堤上



掘不數尺有狀若屋而露其脊者再下尺許啓屋而入見一物正方上銳下廣非土非木亦非金石有文如古篆土人云即息壤也急掩之其夜大雨厯四十餘日江水泛溢決萬城堤幾壞城

海寧孝廉查伊璜繼佐崇禎中名士也嘗冬雪偶步門外見一丐避廡下貌殊異呼問曰聞市井有鐵丐者汝是否曰是也能飲乎曰能引入發醅坐而對飲查已茗予而丐殊無酒容衣以絮衣不謝徑去明年復遇之西

湖放鶴亭下露肘跣行詢其衣曰入春不須此已付酒家矣曰曾讀書識文字乎曰不讀書識字何至為丐耶查竒其言為具湯沐而衣履之詢其氏里曰吳姓六竒名東粵人問何以丐曰少好博進敗其產故流轉江湖自念叩門乞食昔賢不免僕何人敢以為污查遽起捉其臂曰吳生海內竒士我以酒徒目之失吳生矣留與痛飲一月厚資遣之六竒者家世潮陽祖明世為觀察以擣捕故遂為婁人既歸粵寄食充驛卒稔知關河阨

塞形勢會王師入粵避者執六奇六奇曰請得見大帥  
言事既見備陳諸郡形勢因請給遊劄數十通散其土  
豪所至郡縣壁壘皆下帥上其功十年中累官至廣東  
水陸師提督孝廉家居久不復記憶前事一旦有粵中  
牙將叩門請謁致吳書問以三千金為壽邀致入粵水  
行三千里供帳極盛度梅嶺已遣其子迎候道左所過  
部下將吏皆負蘭抱弩矢為前驅抵惠州吳躬自出迎  
導從雜沓擬於侯王至戟門則蒲伏泥首登堂北面長

跪歷叙往事無所忌諱入夜置酒高會身行酒炙歌舞妙麗絲竹迭陳諸將遞起為壽質明始罷自是留止一載榮累鉅萬將歸復以三千金為壽錦綺珠貝珊瑚犀象之屬不可訾計查既歸數年值吳興私史之獄牽連及之吳為之營救查遂獲免於難初查在惠州幕府一日遊後圃園有英石一峰高二丈許深賞異之再往已失此石問之則以巨艦載致吳中矣今石尚存查氏之家六奇後卒官贈少師兼太子太師諡順恪

武昌小南門獻花寺老僧自究者病噎食臨終謂其徒  
曰我不幸罹斯病胸臆間必有物為祟歿後剖視乃可  
入斂其徒如教得一骨如簪形取置經案久之有兵帥  
借寓一日從者殺鵞其喉未殊偶見此骨取以挑刺鵞  
血濺骨立消後其徒亦病噎因前事悟鵞血可療數  
飲之遂愈因廣其傳以方授人無弗愈者


唐初修隋史不為文中子立傳千古疑之且其時總裁  
者魏徵秉筆者陳叔達皆及門也而房杜諸人又皆佐

命力豈不能為其師立一史傳而必待三百年後宋景  
文修唐書始為之表章於王績勃質諸傳耶頃閱仇俊  
卿通史它石論此甚快可破千古之疑其說本於宋史  
非初也宋史謂通為長孫無忌所惡當時畏無忌故遺  
通而無忌之惡王氏則由於王凝次子勳勳貶侯君集  
君集與無忌善因而惡及其祖耳初叔達撰隋紀王績  
欲借觀且曰吾芮城兄亦有隋書若干卷欲續成以終  
其志殆諷之也予謂隋書不為王通立傳五代史不為

韓通立傳二公未嘗以一傳有無為輕重獨可為當時

操史筆者惜耳

韓通不立傳亦別有說。通次子福時福時子凝凝子勔勔勔



香祖筆記卷三